



23. januar 2015

UPA 2015/136

Inatsisartut suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

**“Kalaallit Nunaata uuliasiornermut aatsitassarsiornermullu 2014-imiit 2018-imut periusissaani nutaami Naalackersuisunit saqqummersinneqartumi paasissutissat aallaavigalugit aatsitassarsiornermi suliffissuaqarnitta ineriartortinnissaanut periarfissat pillugit apeqquteqaat aallaavigalugu oqallisissiatut siunnersuut.**

(Inatsisartunu ilaasortat Sara Olsvig aamma Naaja H. Nathanielsen, Inuit Ataqatigiit)

Nunarput aningaasaqarniarnikkut annertuumik ajornartorsiorpoq. Akileraartarnermut Atugarissaarnermullu Ataatsimiititaliap nalunaarutaani ersippoq, atugarissaarnerup ullumikkut nalunngisatta attatiinnarnissaanut aningaasassaqaartitsisinnaanngitsugut, iluarsartuusseqqittoqanngippat isertitassanillu nutaanik nassaanngikkutta.

Imaappoq inuussutissarsiutinik nutaanik assigiinngitsunillu arlalinnik inerisaasariaqartugut. Ukiuni arlalinni politikkikkut isumaqatigiiffiuvoq aatsitassaqaarnikkut uuliasiornikkullu suliffissuaqarneq inuussutissarsiutit taakku ilagissagaat. Aamma ukiuni arlalinni politikkikkut isumaqatigiissutaavoq sinaakkutissat suut iluanni aatsitassarsiorneq uuliasiornerlu inerisarneqassanersut.

00-ikkut ingerlaneranni atortussiassat akii nunarsuaq tamakkerlugu oqaluttuarisaanermi aatsaat taama qaffasitsigippat. Tamatuma nassataraa Nunatta ataaniittunik isumal-luuteqarluni suliniutit aningaasaliinerillu isumalluarfigineqarnerujussuat. 2014-imi pissutsit allanngorsimaqaat. Nunarsuaq tamakkerlugu akit appariartorput, aningaasaliisartullu ilimagisatsinnit mianersornerujussuullutik.

Taamaammat pingaaruteqartorujussuuvoq immitsinnut naapeqatigiilluta aalaakkaassuseq pilersinniarlugu periusissanik inatsisitigullu sinaakkutissanik pilersitsinissarput. Uagut nammineq Nunatsinni ukiuni aggersuni uuliasiornerup aatsitassarsiornerullu tungaatigut suut ilimagisinnaanerlugit ilisimaniassagatsigu, aammattaarli avataaniit aningaasaliisartut suliniaqatigiiffiillu ilisimaniassammassuk Kalaallit Nunaanni suut atugassarissanerlugit ilimagisinnaanerlugillu.

2014 aallartilaartoq Naalackersuisut uuliasiornermut aatsitassarsiornermullu 2014-imiit 2018-imut periusissaq saqqummiuppaat.

Periusissaq tusagassiuutitigut oqallisaaqaaq, Inatsisartullu Aatsitassanut Ataatsimiititaliaa juni qaammat periusissaq pillugu tamanut ammasumik tusarniaalluni. Kisianni periusissaq Inatsisartuni partiinit ataasiakkaanit suli oqallisigineqanngilaq. Naak pineqartoq inuutissarsiutinik ingerlatsinermut tamarmut, suliffissaqaartitsiniarnermut, avatangiisitsinnut nunarsuarlu tamakkerlugu attaveqarfitsinnut pingaaruteqaraluaqisoq.

Isumaqarpugut soqutigintuusoq tusassallugu partiit ataasiakkaat atortussiassatigut sillimmatitta iluaqutiginissaat pillugit qanoq isumaqarnersut. Atortussiassanut tunngasutigut maanna pisut eqqarsaatigalugit partiit ataasiakkaat qanoq ilimagisaqarpas? Partiit ataasiakkaat inuutissarsiornikkut politikimi ataqatigiissuseq qanoq pilersinneqarsinnaasorivaat, inuussutissarsiornernerup immikkoortui tamarmik ineriartortinneqassappata? Atortussiassanut tunngatillugu ulorianartorsiornermut ersiutaasinnaasut ajutoorfiusinnaasullu suut partiit ataasiakkaat takusinnaasoraat?

Qaammatini kingullerni marlussunni oqallinnerup erseqqissumik takutippaa Nunatsinni atortussiassatigut politikikkut isumaqatigiinnissaq aalaakkaassutsillu pilersinnissaa pisariaqartinneqartut. Neriuppugut oqallinneq manna partiit isummersornerisa ersersinnissaannut, neriunartumillu tamatta immikkut isummersornitta paasinerunissaannut peqataajumaartoq.

Isumaqatigiinnginnerup annertunerup pilersinnissaa siunertaanngilaq. Siunertaavoq kikkut tamarmik pitsaasumik siunertaqarlutik politikikkut neriutiminnik, isummersuuti-minnik ernummatiminnillu saqqummiinissaat.

Tamassi torersumik pilersitsiffiulluurtumillu oqalliseqataanissassinnik kissaappassi.